

### 0.0.1 jāṇussonīsuttaṃ

#### 0. sāvattihinidānaṃ

1. atha kho jāṇussonī brāhmaṇo yena bhagavā tenu-pasaṅkami. upasaṅkamtivā bhagavatā saddhiṃ sammodi. sammodaniyaṃ kathaṃ sārāṇiyaṃ vītisāretvā ekamantaṃ nisīdi. ekamantaṃ nisinno kho jāṇussonī brāhmaṇo bhagavantaṃ etadavoca:

2. ahaṃ hi bho gotama evaṃvādī evaṃdiṭṭhī: "natthi yo so maraṇadhammo samāno na bhāyati. na santāsaṃ āpajjati maraṇassā" ti.

3. atthi brāhmaṇa maraṇadhammo samāno bhāyati, santāsaṃ āpajjati. maraṇassa. atthi pana brāhmaṇa maraṇadhammo samāno na bhāyati, na santāsaṃ āpajjati maraṇassa.

4. katamo ca brāhmaṇa maraṇadhammo samāno bhāyati, santāsaṃ āpajjati maraṇassa?

5. idha brāhmaṇa ekacco kāmesu avītarāgo hoti avigatachando avigatapemo avigatapipāso avigataparilāho avigatataṇho, tamenaññatara gālho rogātaṅko phusati. tassaññatarena gālhena rogātaṅkena phuṭṭhassa evaṃ hoti: piyā vata maṃ kāmā jahissanti, piye vāhaṃ kāme jahissāmīti. so socati kilamati paridevati urattāliṃ

kandati sammohaṃ āpajjati. ayaṃ kho brāhmaṇa maraṇadhammo samāno bhāyati, santāsaṃ āpajjati maraṇassa.

6. puna ca paraṃ brāhmaṇa idhekacco kāye avītarāgo hoti avigatachando avigatapemo avigatapipāso avigataparilāho avigatataṇho. tamenaññataro gālho rogātaṅko phusati. tassaññatarena gālhena rogātaṅkena phuṭṭhassa evaṃ hoti: piyo vata maṃ kāyo jahissati. piyaṃ cāhaṃ kāyaṃ jahissāmīti. so socati kilamati paridevati urattālīṃ kandati sammohaṃ āpajjati. ayampi kho brāhmaṇa maraṇadhammo samāno bhāyati, santāsaṃ āpajjati maraṇassa.

7. puna ca paraṃ brāhmaṇa idhekacco akatakalyāṇo hoti akatakusalo akatabhīruttāṇo. katapāpo kataluddo katakibbiso. tamenaññataro gālho rogātaṅko phusati. tassaññatarena gālhena rogātaṅkena phuṭṭhassa evaṃ hoti: akataṃ vata me kalyāṇaṃ, akataṃ kusalā, akataṃ bhīruttāṇaṃ. kataṃ pāpaṃ, kataṃ luddaṃ, kataṃ kibbisaṃ. yāvatā bho akatakalyāṇānaṃ akatakusalānaṃ akatabhīruttāṇānaṃ katapāpānaṃ kataluddānaṃ katakibbisānaṃ gati, taṃ gatīṃ pecca gacchāmīti. so socati kilamati paridevati urattālīṃ kandati sammohaṃ āpajjati. ayampi kho brāhmaṇa maraṇadhammo samāno bhāyati, santāsaṃ āpajjati maraṇassa.

8. puna ca paraṃ brāhmaṇa idhekacco kaṅkhī hoti vecikicchī anittamaṅgato saddhamme. tamenaññataro gālho rogātaṅko phusati. tassaññatarena gālhena rogātaṅkena phuṭṭhassa evaṃ hoti: kaṅkhī vatamhi vecikicchī anittamaṅgato saddhammo'ti. so socati kilamati paridevati urattāḷiṃ kandati sammohaṃ āpajjati. ayaṃ kho brāhmaṇa maraṇadhammo samāno bhāyati, santāsaṃ āpajjati maraṇassa.

9. ime kho brāhmaṇa. cattāro maraṇadhammā samānā bhāyati, santāsaṃ āpajjanti maraṇassa.

10. katamo ca brāhmaṇa maraṇadhammo samāno na bhāyati, na santāsaṃ āpajjati maraṇassa? idha brāhmaṇa ekacco kāmesu vītarāgo hoti vigatacchando vigatapemo vigatapipāso vigataparilāho vigatataṇho. tamenaññataro gālho rogātaṅko phusati. tassaññatarena gālhena rogātaṅkena phuṭṭhassa na evaṃ hoti: piyā vata maṃ kāmā jahissanti, piye vāhaṃ kāme jahissāmīti. so na socati na kilamati na paridevati na urattāḷiṃ kandati na sammohaṃ āpajjati. ayaṃ kho brāhmaṇa maraṇadhammo samāno na bhāyati na santāsaṃ āpajjati maraṇassa.

11. puna ca paraṃ brāhmaṇa idhekacco kāye vītarāgo hoti vigatacchando vigatapemo vigatapipāso vigataparilāho vigatataṇho tamenaññataro gālho rogā-

taṅko phusati. tassaññatarena gālḥena rogātaṅkena phuṭṭhassa na evaṃ hoti: piyo vata maṃ kāyo jahissati, piyaṃ cāhaṃ kāyaṃ jahissāmīti. so na socati na kilamati na paridevati na urattāliṃ kandati na sammohaṃ āpajjati. ayampi kho brāhmaṇa maraṇadhammo samāno na bhāyati, na santāsaṃ āpajjati maraṇassa.

**12.** puna ca paraṃ brāhmaṇa idhekacco akatapāpo hoti akataluddo, akatakibbiso. katakalyāṇo hoti katusalo katabhīruttāṇo. tamenaññataro gālho rogātaṅko phusati. tassaññatarena gālḥena rogātaṅkena phuṭṭhassa evaṃ hoti: akataṃ vata me pāpaṃ, akataṃ luddaṃ, akataṃ kibbisaṃ, kataṃ kalyāṇaṃ, kataṃ kusalaṃ, kataṃ bhīruttāṇaṃ. yāvatā bho akatapāpānaṃ akataluddānaṃ akatakibbisānaṃ katakalyāṇānaṃ kata kusalānaṃ katabhīruttāṇānaṃ gati taṃ gatiṃ pecca gacchāmī ti. so na socati na kilamati na paridevati na urattāliṃ kandati na sammohaṃ āpajjati. ayampi kho brāhmaṇa maraṇadhammo samāno na bhāyati na santāsaṃ āpajjati maraṇassa.

**13.** puna ca paraṃ brāhmaṇa idhekacco akaṅkhī hoti avecikicchī niṭṭhaṃgato saddhamme. tamenaññataro gālho rogātaṅko phusati. tassaññatarena gālḥena rogātaṅkena phuṭṭhassa evaṃ hoti: akaṅkhī vatamhi avecikicchī niṭṭhaṃgato saddhammeti. so na socati na kilamati na paridevati na urattāliṃ kandati na sammohaṃ āpajjati. ayampi kho brāhmaṇa maraṇadhammo

samāno na bhāyati, na santāsaṃ āpajjati maraṇassa.

14. ime kho brāhmaṇa cattāro maraṇadhammā samānā na bhāyanti, na santāsaṃ āpajjati maraṇassāti.

15. abhikkantaṃ bho gotama, abhikkantaṃ bho gotama seyyathāpi bho gotama, nikkujjitaṃ vā ukkujeyya, paṭicchannaṃ vā vivareyya, mūlhassa vā maggaṃ ācikkheyya, andhakāre vā telapajjotaṃ dhāreyya cakkhumanto rūpāni dakkhintīti, evameva bhotā gotamena anekapariyāyena dhammo pakāsito. esāhaṃ bhagavantaṃ gotamaṃ saraṇaṃ gacchāmi, dhammaṃ ca bhikkhusaṅghaṃ ca. upāsakaṃ maṃ bhavaṃ gotamo dhāretu, ajjatagge pāṇupetaṃ saraṇaṃ gatanti.